

14 MAY 2001

SC-SEBI

SC, SEBI METERAI MOU UNTUK BEKERJASAMA

KUALA LUMPUR, 14 Mei (Bernama) -- Suruhanjaya Sekuriti (SC) Malaysia hari ini memeterai Memorandum Perfahaman (MoU) dengan Lembaga Sekuriti dan Bursa India (SEBI) bagi mengadakan rangka kerja bantuan dan kerjasama antara Malaysia dan India.

Pemeterian MoU itu disaksikan oleh Perdana Menteri Malaysia Datuk Seri Dr Mahathir Mohamad dan Perdana Menteri India Atal Bihari Vajpayee di Putrajaya.

SC, dalam kenyataannya di sini, menyatakan: "MoU itu menandakan keperluan bagi kerjasama yang lebih banyak antara India dan Malaysia bagi mengawasi dan memajukan pasaran sekuriti dan hadapan dengan berkesan memandangkan hubung kait perdagangan melepasi sempadan dan melepasi pasaran yang lebih besar ekoran globalisasi pasaran-pasaran kewangan."

Di bawah MoU itu, kedua-dua pengawal selia akan mengiktiraf keperluan bagi penyediaan bantuan dan pertukaran maklumat untuk saling membantu dalam memastikan pematuhan undang-undang dan peraturan di negara masing-masing, katanya.

Sejajar dengan itu, skop MoU itu termasuk menyediakan bantuan dan mengambil tindakan terhadap urusan dalaman, manipulasi pasaran dan amalan-amalan penipuan lain dalam urusan sekuriti.

"Pertukaran maklumat juga bertujuan untuk menggalakkan piawai urusan adil yang tinggi dan integriti dalam menjalankan perniagaan.

"Pada asasnya, pemeterian MoU ini akan membantu melindungi kepentingan para peserta pasaran dan memastikan pembangunan adil dan tersusun pasaran sekuriti dan hadapan negara-negara yang terlibat," katanya.

Sementara itu, Pengerusi SC Ali Abdul Kadir dipetik oleh kenyataan itu sebagai berkata kerjasama Selatan-Selatan adalah penting bagi pertukaran maklumat, pengetahuan dan kemahiran di kalangan negara-negara Selatan.

"Pasaran-pasaran sekuriti yang semakin menjadi produk antarabangsa telah mewujudkan cabaran baru bagi rantau ini. Sebagai pengawal selia, kita mesti berpadu tenaga bagi memastikan terdapat perlindungan yang mencukupi bagi pelabur dalam pasaran yang sentiasa berubah," katanya.

MoU yang dimeterai hari ini adalah MoU yang kel3 yang dimeterai oleh SC dengan rakan-rakan sejawatnya. SC sebelum ini telah memeterai MoU dengan pengawal selia pasaran di Argentina, Australia, Brazil, Chile, China, Hong Kong, Indonesia, Kenya, Afrika Selatan, Taiwan dan Thailand. -- BERNAMA

COY KTC JR